



Broj: 16-01/3-14-3204- /11  
Datum: 20.09.2012. god.

## **REPUBLIKA ČEŠKA**

**Predsjednik Republike Češke**  
**Gosp. Václav Klaus**

**Ministar unutrašnjih poslova Republike Češke**  
**Gosp. Jan Kubice**

### **PREDMET: ZAHVALNICA**

Poštovani,

U okviru bilateralne međunarodne policijske saradnje i na poziv Državne agencije za istrage i zaštitu (SIPA), pripadnici Odjeljenja za specijalističke ronilačke aktivnosti i obuku BRNO Policije Republike Češke uspješno su realizirali projekat čišćenja dijela korita rijeke Save od mina zaostalih iz prethodnog rata. Projekat je proveden u periodu od 03. do 12. septembra 2012. godine u Orašju, na sjeveru Bosne i Hercegovine. Pored SIPA-e i Ronilačkog odjeljenja BRNO, u pripremi i realizaciji ovog projekta učestvovalo je 13 institucija iz Bosne i Hercegovine i Republike Hrvatske, uključujući i Ambasadu Republike Češke u Sarajevu.

Tokom realizacije projekta, elitni ronionci Policije Republike Češke su iz rijeke Save izvadili 149 minobacačkih i tromblonskih mina različitog kalibra, dok su dvije minobacačke mine uništene na licu mjesta u vodi, jer nisu bile bezbjedne za vađenje. Sve izvađene mine su, u prisustvu predstavnika Odjeljenja za specijalističke ronilačke aktivnosti i obuku BRNO, uništene na vojnom poligonu „Odlučna BARBARA“ kod grada Glamoča na zapadu Bosne i Hercegovine. Ovom prilikom, ukupno je uništeno 1442,4 bruto kilograma NUS-a.

O izuzetno velikom značaju projekta govori činjenica da je ovo prvi bh multiagencijski i ujedno prvi međunarodni projekat ovakve vrste, realizovan u Bosni i Hercegovini. Projekat je od istinske važnosti, ne samo za države čije institucije su aktivno učestvovale u njegovoj realizaciji, nego i za širu međunarodnu zajednicu, budući da je rijeka Sava međunarodni plovni put. Pored toga, realizacijom projekta deminiranja dijela korita rijeke Save, ronilački eksperti Policije Republike Češke dali su značajan doprinos sigurnosti građana Bosne i Hercegovine i Republike Hrvatske, imajući u vidu činjenicu da je rijeka Sava prirodna granica između naše zemlje i Republike Hrvatske.

Želim naglasiti da su pripadnici Odjeljenja za specijalističke ronilačke aktivnosti i obuku BRNO Policije Republike Češke, na čelu sa pukovnikom Lubomirom Znojilom i majorom Filipom Lipovskim, tokom realizacije projekta, pokazali izuzetnu hrabrost, predanost, požrtvovanost, posvećenost, ozbiljnost i profesionalizam, koji mogu poslužiti kao primjer.

Shodno navedenom, koristim ovu priliku da Vama lično, ali i pripadnicima Ronilačkog odjeljenja BRNO uputim iskrene izraze zahvalnosti i poštovanja, ali i nade u nastavak jednako uspješne saradnje. Ovo posebno zbog činjenice da, prema procjenama ronilačkih eksperata Policije Republike Češke, u rijeci Savi, na lokalitetu u Orašju, još uvijek se nalazi značajna količina NUS-a, koju zbog vremenskog ograničenja realizacije projekta nije bilo moguće izvaditi iz rijeke Save. Također, Ronilačkom timu Jedinice za specijalnu podršku SIPA bi itekako dobrodošla stručna pomoć, odnosno obuka od strane pripadnika Ronilačkog odjeljenja BRNO, čime bi se značajno ojačali kapaciteti i unaprijedio ukupan rad naše Agencije.

Uz posebne izraze zahvalnosti Ambasadi Republike Češke u BiH i Vladi Republike Češke, želim naglasiti da Republika Češka, kao i policija Vaše zemlje treba da bude iznimno ponosna što u svom sastavu ima istinski elitno Ronilačko odjeljenje sastavljeno od stručnjaka u oblasti forenzičkog i specijalističkog ronjenja. Stoga, mi sa svoje strane izražavamo nadu da će Vaša Vlada dati punu podršku daljem jačanju navedenog Odjeljenja, kako u kadrovskom, tako i u materijalnom pogledu.

S poštovanjem,

**DIREKTOR**  
**Goran Zubac**